

Ngu jo cjua xi chja
xujun changá tsēhē Nina X

Historias del Antiguo Testamento X

1 Reyes 5 - 1 Reyes 22



en el mazateco de Chiquihuitlán de Juárez

**Ngu jo cjua xi chja
xujun changá tsëhë Nina X**

Historias del Antiguo Testamento X

1 Reyes 5 - 1 Reyes 22



**Las ilustraciones en las páginas 2 y 11 al fin son propiedad de la Fundación David C. Cook,
usadas con permiso**

**Primera edición
Historias del Antiguo Testamento X
en el mazateco de Chiquihuitlán de Juárez
México, D. F. .6C
Enero de 1994**

Historias del Antiguo Testamento X

Salomón ne, sahmi me ngu ndihya yungun rë Nina

(1 Reyes 5-7; 2 Crónicas 2:1-5:1)

Hya xi tacun cuaha David cjuahñu, ngu me xi hmi rë Hiram xi vitexa me nandya Tiro ne, jemu vinga rë me David. Hane hya xi camachaya rë me xi cahme nima ne, catsingatju me xuta rë me cojo sá xi cjuahatsja Salomón cjuandaja rë me. Hya xi camá ne, catsicuya Salomón cjua, hacuaha cafehya me Hiram ngu cjuandaja. Cafehya rë me xi sua me xuta chjineya rë me xi cuisecoo rë xuta tjë rë Israel xi cuatë me ya tsindyu xi tjin ngajan ladu rë Tiro ta, ya vëhë ne, jemu cuma meje xi tsindaja me yungun tsëhë Nina. Hane Hiram ne, cachja me xi cuma vë. Hya xi camá ne, Salomón ne, catsingatju me xuta ladu rë me xi sahmi me xa vë, hacuaha catsingatju me yëjë comida xi cumá meje rë. Cuatjin casahmi Salomón cojo sá xi cuesuntaha me xcusun xi cavinchandaja nima nahmi rë me xi cumameje rë xi cuma yungun.



Hya xi má ñuju nu xi tisahmi me gobiernu ne, Salomón ne, cavetsihin me casahmi me yungun jan. Nu vëhë ne, ha tjin rë ñuju cientu cojo ñujuchan nu hisca hya xi cavetju xuta tjë rë Israel tsëhë nangui Egipto. Hisca nu vëhë ne, ngu ndihya tsjian ni camachjirëhë tsëhë yungun. Sehe casahmi Salomón yungun jan xi má ngu ndihya ngajan Jerusalén xcun nangui hiscan cachja nima nahmi rë me xi cumá, hiscan catsindaja nima ngu ngasuncun hya xi cavatju chíhin cjan rë. Yungun xi casahmi Salomón ne, tjin rë chuva rë të metru xi

teya cojo cantë metru xi nduju cojo tyjuhun metru xi hnga. Cahndë hiscan cuisehen xuta ne, tjin ngu corredor xi fi yějě ni jingu xi teya rě yungun. Corredor jan ne, chuva rě hñu metru má. Taha cahntsua yungun ne, caticja rě, hane jo cahndë camá tangun sacuaha camá tsěhě yungun tsjian. Ngu cahndë xi tacun taha hiscan xi visehen xuta ne, tjin rě can metru xi nduju cojo can metru xi teya. Cahndë xi majo ne, cahndë rcun má. Cahndë vėhě ne, cuadradu tjin, hane jima ngu ladu rě, tē metru má. Cahndë rcun jan ne, ngajan cavincha me caxa ximinchacun rě Nina. Hacuaha casahmi me jo xcusun rě ángel xi hmi rě querubines xi hacuaha caviyuju cahntsua cahndë rcun. Hacuaha cavityanguí me ngu tsjian xi cavatēcja rě catsijo cahndë jan. Yějě tahandee rě yungun, ngajan ndatsen rě ne, cama ndihya langa xi machjirėhě xi xinchandaja me ngu tsě ngu xti rě xi cuma meje tsěhě yungun. Sacuaha suva ndihya ne, camá tsěhě suva ndyojo. Peru cahntsua ne, matsijin ndyojo rě ta tjun casaxtē rě ya tsindyu hane sehe casaxtē rě ya vėhě cojo oro. Cahntsua ne, cavincha me ngu ngasunscun lihndi hiscan ti tyjungunsa. Hacuaha casahmi me tē maxě hiscan cuiyujun pan. Tē candaleru casahmi me hacuaha ngu cientu tyucu casahmi me. Yějě ni xcusun jan ne, oro camá.



Esta ilustración
no está
disponible.

**Ngu chjine quicha ne, Hiram hmi rë. Me vëhë ne, cavundecjaya
me quicha sine, sehe casahmi me ngu ndava nanda jyë cojo.
Hacuaha cojo vëhë ni casahmi me të xcusun hiscan xi vaneya ntsaan
xi hacuaha finiya xcun rueda xi hinchá ngahma rë. Hacuaha
casahmi me ngu ngasuncun jyë hiscan tsiquehen me chu xi sua me
cjuatjo cojo Nina cojo yëjë yahntsan cojo quicha lehva cojo**

tijiquicha xi meje rë hya xi tsiquehen me chu. Sehe casahmi me jo columna cojo quicha sine xi caxinchataha ngu ngu ndaya rë hisca xi cuiseen tsëhë yungun.

Catsinguijnetaha casahmi me yungun hya xi ha tjin rë tengu nu xi sahmi me gobiernu. Hane hisca hya xi cavetsihin ne, yatu nu má. Hya xi cajnetaha xa rë yungun ne, Salomón ne, quijicojo me yëjë oro cojo quicha tyava xi casua nima nahmi rë me Nina, sehe casetjo rë quicha vë cahntsua yungun. Sehe cavetsihin casahmi me cahndë rcu rë suva me, hisca sahmi me gobiernu ngajan Jerusalén.

**Salomón ne, casahmi me suhi xi cajnetaha
catsindaja me yungun, cojo sá xi yungun jan ne,
cuejñaxa tsëhë Nina**

(1 Reyes 8:1-9:9; 2 Crónicas 5:2-7:22)

Hya xi cajnetaha xa xi cumá yungun ne, catsingatju Salomón cjua tsëhë xuta xi hitsë sa vechu me tsëhë nangui Israel xi cuinduva me vëhë Jerusalén hya xi cuma suhi rë ndihya xca. Meje rë me xi cumatangun xuta hya ta ha ngu ndiya ni ne, hacuaha cuma ngu suhi

tsëhë xa xi cajnetaha. Hacuaha mameje rë xi cjuejaha xuta caxa ximinchacun hiscan tacun, hiscan ndihya tsjian xi nima David casahmi me tsëhë. Hya xi camatangun yëjë xuta ngajan Jerusalén ne, sehe cafehe xuta Levíta cojo caxa ximinchacun jan, cavejña me caxa jan cahntsua cahndë rcun rë yungun, ngahma rë tyjunga rë ángel xi sehe camá tsëhë quicha. Hya ne, tsajin mé sa xi hinchahntsua caxa ximinchacun jan, suva jo ndyojo hisca camahindu të ley rë compromisu xi camá cojo xuta tjë rë Israel. Nixtin hya ne, jemu cjin mil chu catsiquehen xuta tjë rë Israel xi sua me cjuatjo rë Nina. Hya ne, casë hacuaha catsijane nahmi cojo yahnga xuta tjë rë Leví xi cavaxëndaja me Nina rë me, o sá Yahvé. Casahmi jyë casahmi hnga me Nina ta Nina ne, jemu ndaja me, hane tsajin nixtin xi catsichaya me xuta jan. Hane jinguyëjë rë xi tisë me ne, cajne Nina ngajñi rë ngu yufi xi jemu seti, hane catsë rë yungun jan. Hane hora vëhë ne, camajin casahmi nahmi xa rë me cahntsua yungun ta jemu hñu seti tsejen.

Hya xi camá ne, cuitjin cachja Salomón:

—Nina ne, jemu ndaja me. Suva me cavaxijin me nandya Jerusalén sacuaha nandya rë suva me. Hacuaha cavaxijin me nima nahmi naha xi camá me xuta xi matitjun tsajan. Hya xi catsingatahacacun nima xi meje tsindaja me ngu ndihya xi cuma tsëhë Nina ne, cuitjin cachja Nina: Hacuian ngaye nihñi ta quihndi riji cuma tsindaja cha vë. Quihndë ne, camachihin cjua xi cachja me cojo nahmi naha. Ta tejña sacuaha quihndi rë nima, sacuaha xuta matitjun tsujun, hane casahme vëhë hacuaha cavejña caxa ximinchacun cahntsua.

Sehe cuitjin cachja Salomón xi casahmi me oración rë me:

—Ngayun Yahvé, tsajin sa ngu nina xi cuechutaha xcusun nuju. Ngayun ne, nihñu compromisu cojo xuta nuju hacuaha sehe nihñuchuhun compromisu vë. Sacuaha cjua tsëhë yungun xi canújun cojo nima nahmi naha David ne, nguehe tsejen xi canihñuchuhun cjua vë. Hacuaha canújun xi sá xi xuta tjë rë nima ne, cjuenduju sahmi me sacuaha chja cjua rë ley nuju ne, sehe yëjë nixtin satë rë ngu xuta tjë rë nima xi sahmi me gobiernu rë yëjë xuta


tjē rē Israel. Hindē ne, tiféhya nuju xi hacuaha nihñuchuhun cjua vē.

'Ha camá casahme ndya nuju vi. Peru ngayun ne, ¿hacutjin cumá xi cuinechuntuhun cahntsua ngu ndihya xi xuta casahmi me? Ngayin ne, hyin xi jercu jyē yun, hisca tsinguitsē rē ngahnga cojo yējē ni tsēhē. Peru suvun canújun xi cuinechunyun yungun xi catsindája, vēhē xi féhya nuju xi yējē nixtin ne, cuinechun nguehe. Hane hya xi sahmi xuta nuju oración rē me cahntsua yungun vi, o sá ndastu scutsejen me ta vihi sá xi cjín quitaha me tsēhē ne, féhya nuju xi nihñucuendun cjua rē me. Hane jiya hora ne, hya xi choho sahmi xuta nuju ne, hane ngatsē rē vēhē ne, xuta condra rē me scaa rē me xcun si, o sá tsajin nanda, o sá cuma jindya, o sá nduva ngu chíhin cjan rē, sehe sá xi ngajñi rē cjuacjintacun vēhē ne, sá xi choho cuma rē me hane sahmi me oración rē me hane tsindeya me cjuatacun rē me ne, nihñu favor xi nihñucuendun cjua rē me sehe ninchatuhun rē me. Hane sacuaha xutaxin ne, sá xi cumachaya rē me xi ngayun ne, jemu jyē hnga ngayun cojo cjuatacun nuju, hane sá xi cuinduva me sahmi me oración rē me cahndē vihi ne, hacuaha féhya nuju xi nuhyun tsēhē me. Cuatjin cumá cojo sá xi chuva vēhē ne, ngayējē

ni xuta ngasunhndë ne, cumachaya rë me tsujun hane cjuaharcun me ngayun. Cumá xi cuechu nixtin xi xuta nuju cuihndiin me tsujun hane ngatsë rë vëhë ne, tuhun cahndë xi xutaxin ne, cjucojo me me xi cumá me mosu rë me hiscan nangui rë me. Sá xi cuatjin cumá peru ngajñi rë cjuacjintacun vë, choho cuma rë xuta nuju ngatsë rë jyë rë me hane cuya scutsejen me taha hiscan tacun yungun vihi ne, nihñu favor xi nihñucuendun rë cjua rë me hane ninchatuhun rë me.

Hya xi cajnetaha casahmi Salomón oración rë me ne, Nina casahmi me xi caxtundi ndihi tsëhë ngahnga. Hane ndihi jan ne, cavaca rë yëjë cjuatjo xi tjin chihin xi siu ngajan. Hane xi cavutsejen xuta xi cachuya rë Nina tsëhë me ne, casua me nacuechji rë Nina, hane cavixcunhnchi me. Sehe catsiquehen me chu tsánga cojo chu ndyaja. Jemu cjín mil chu catsiquehen me chu xi sua me chu cjuatjo cojo Nina. Sacuaha suhi vë ne, quijicani rë jyin nixtin, hane xi cajnetaha jyin nixtin jan ne, sehe cavuya cafe xuta ndava me. Peru jemu ndama rë me ngatsë rë cjuandaja xi tjin rë Nina cojo nima David, cojo Salomón, hacuaha cojo yëjë yahnga xuta tjë rë Israel.

Ngu nguixun xi cavatju hitsë nixtin suhi vë ne, cafehetsyen
 Nina xcun Salomón, me xi matitjun. Cachja Nina xi cahndë me
 oración xi casahmi Salomón ngatsë rë yungun jan. Hane nixtin vë
 cojo nixtin xi cjuenduju sa ne, tsingatihin Nina xi ngajan yungun
 vëhë ne cjue cojo xuta cjuatjo xi sua me Nina. Hacuaha ngajan
 cjuahacuenda Nina oración rë me. Hacuaha cachja Nina xi
 tsinchataha me xuta hya xi tsingatihin me xi cachaja me peru
 quihndë ne, tsindeya me cjuatacun rë me. Hane sacuaha tsëhë suva
 Salomón ne, catsinguitsjen me Salomón compromisu xi tsëhë suva
 me. Sá xi sahmi chihin me cjua rë ley rë Nina hane hacuanitjin ni
 sahmi xuta tjë rë me ne, suva xuta tjë rë me satë rë me xi cuma me
 xuta matitjun tsëhë xuta nangui Israel. Cuatjin ndatjin. Peru sá xi
 cuihndiin me, sá xi cjuetjengui me nina ndacha ne, cuaxëxin Nina
 xuta tjë rë Israel tsëhë nangui rë me. Hane cjín cuejñataha me tsëhë.
 Hacuaha hisca yungun jan ne, hindë cumachjiriin sacuaha cahndë
 rcun, hane xutaxin ne, cuinduva me tsinguetsun me. Sá xi cuatjin
 cumá ne, tu yo ni me xi scuëë xi caffè cavetsun yungun ne,
 cumachaya rë me xi cjuacjintacun vëhë camá ngatsë rë macjain rë
 xuta nina ndacha cahndë rë xi cumacjain rë me Nina xi cjuaquixi.



**Cafehe nixtin xi jercu hñu camá Salomón cojo
cjuatacun rē me**

(1 Reyes 9:10-10:29; 2 Crónicas 8:1-9:29)

Catsindaja Salomón, me xi matitjun tsēhē nangui Israel, yungun
rē Nina, hane sehe catsindaja me cahndē rcu rē suva me. Hane xa rē



jo ndihya vëhë ne, can nu quijicani rë. Casahmi me ngujoyë xi xutaxin xi siu me ngajan nangui Israel ne, sahmi me jo xa jan ne cojo yahnga xa xi hacuaha tacunya rë me. Hacuaha me vëhë ne, casahmi me ngujoyë xi sahmi me hinchua xi casexo rë yëjë tahandee rë nandya Jerusalén cojo ngujo sa nandya sacuaha ngahñu rë. Sehe cavitexa Salomón xuta xi catsindaja me barcu. Hane Hiram, me xi

matitjun tsëhë nandya Tiro ne, catsingatju me xuta rë suva me xi
 cjue cjin me cojo barcu rë Salomón cojo sa xi cjuejaha me oro cojo
 tuseti cojo ya ndaja xi ndacun cojo nehñu chu elefante cojo chu
 langun xi cumá tsëhë Salomón.

Camachaya rë na xi matitjun na tsëhë nangui Sheba xi yějë ni
 xuta chja me xi jercu vechutaha cjuatacun rë Salomón hacuaha jemu
 nchina me. Vëhë xi cafehe cavusehenya na me ta tjin cjua xi jemu
 chja xi meje cuisiajmi na cojo me. Hane Salomón ne, ndaja
 catsicuya me cjua rë na. Hacuaha quijircu rë na ta jemu ndajyih
 camaha ni cahndë rcu rë Salomón hacuaha ndastu mé tjin xi sahmi
 chaja ngajan. Vëhë xi cuitjin cachja na:

—Hya xi sehe cuinduvá ne, xi má ná ne, quixiin yějë cjua xi
 chja xuta tsujun xi jercu ndatjin. Peru quihndë xi tivutséjen ne,
 tsejen xi quixi jain cjua vë. Quixi peru castetaain sa me cuichja me
 tsëhë yějë ni ta hitsë sa ndajyih xi cjuaquixi xi cuma rë cjua xi
 casacu ná. Xi má ná ne, jemu ndama rë xuta nuju cojo xutaxa nuju.
 Hacuaha Nina nuju ne, jercu ndaja casahmi me cjuandaja cojo
 nangui Israel ta casua me yun sacuaha me xi matitjun tsëhë xuta.



Hya xi camá ne, ngajan casua na cjuatjo oro cojo tuseti cojo yějě xcusun xi secjan rě comida cojo sa xi ndaja chině. Hane sacuaaha ladu rě Salomón ne, hacuaaha casua me na cjuatjo xi cavuxijin na tsěhě cahndě hiscan cavetjo me cjuanchina rě me. Hya xi camá ne, cavuya cafe na nangui rě na.

Nixtin hya ne, nunu ne, jercu cjin tujunsa cafahtsja Salomón sá tsěhě xutaxin xi siu me ngajan nangui rě me o sá xi tsěhě xuta rě nangui vě. Sacuaaha silla rcun rě me ne, camá tsěhě suva me. Camá tsěhě nehñu rě chu elefante xi casaxtě rě cojo oro. Hacuaaha silla

rcun jan ne, hacuiin nangui quitaha ta hnga hitsë. Hane xi nduvatiña xuta tsëhë ne, finiji me jyun ndë rë. Hacuaha casahmi me xcusun rë chu xa cjan rë, ngu ngu chu jima ladu silla jan, cojo ngu ngu chu jima ngu tahandee rë ndë rë. Hora xi cahvi me nanda ne, cahviya me ngu tasa oro. Tjin rë me ñuju mil chu naxin xi machjirëhë tsëhë si, cojo tejo mil sa chu xi machjirëhë tsëhë carreta. Jemu cjín ma chu naxin rë me hane hisca cama meje sa rë nandya hiscan xi cuiyuju chu. Hane casahmi me ngu nandya jan hiscan xi cuiyuju chu. Tsajin sa ngu me xi matitjun xi tjin rë me cjuanchina sacuaha tjin rë Salomón nixtin hya. Hacuaha tsajin yo sa xi cuma cuechutaha cjuatacun xi tjin rë me.

**Hya xi camá changá Salomón ne, cavechutaha ngu
nixtin xi cahndiin me tsëhë Nina**

(1 Reyes 11; 2 Crónicas 9:30-31)

Salomón ne, jercu chuya rë me yachjin hane jercu tu cjín chjuun cafaha me caviyuju cojo me. Yahnga yachjin jan ne, na xutaxin na ta cafaha me na xutaxin handasa xi cachja Nina cojo xuta tjë rë Israel xi cuixaain me cojo chjuun xi na ngu nangui na. Cavixan me

cojo na quihndi rē me xi matitjun tsēhē nangui Egipto hacuaha cojo cjin sa na ngu nangui. Sacuaha na xutaxin jan ne, tjin rē na xcusun xi faharcun na nina ndacha. Hacuaha hya xi cama changá Salomón ne, cojo me cavetsihin xi cafaharcun me nina ndacha ta tjercu meje rē me chjuun rē me. Hacuaha cavitexa me xuta rē me xi catsindaja me ngasunscun rē nina ndacha jan tiña taha tsēhē Jerusalén cojo sa xi ngajan tiña má cjuaharcun na nina ndyojo rē na. Hisca cojo me cafaharcun me nina ndacha vē tangun ni sacuaha cafaharcun me Nina xi cjuaquixi. Hya xi camá ne, Nina ne, camá cjan rē me cojo Salomón. Cuitjin cachja me:

—Canihñiichiin cjua rē ley naha. Vēhē xi ha quihndē suaan cahndē xi xuta tjē riji cumá me xuta matitjun tsēhē yējē nangui Israel. Cuitexa me peru hacuiin tsēhē yējē ni ta cuitexa me tsēhē cahndē xi hitsē sa lihndi. Hacuaha ngu cjuandaja ni vēhē ta sahme ngatsē rē cjua xi cachjá cojo David hacuaha ngatsē rē xi yungun naha ne, ngajan tacun. Vēhē xi ngajan ni cuitexa xuta tjē riji cojo sa xi cuma chihin cjua xi chja xi cuitexa ngu xuta tjē rē David nahmi riji taha vēhē. Hane sacuaha yahnga nangui Israel ne, ngujo cha xi mangutacuin cojo ta sahmi cha xa riji ne, cuma cha xuta matitjun.



Hya xi cajnetaha cachja Nina cojo Salomón ne, cavetsihin xi cavetsun ngahñu rë me. Hane xutaxin tsëhë nandya xi siu tahandee ne, casuandya rë me. Cafë cjuajeya.

Hya ne, tjin ngu me tsëhë tjë rë Efraín xi hmi rë Jeroboam. Hacuaha sahmi me xa rë Salomón. Ngu nixtin xi quiji Jeroboam ngu tixa xin tsëhë Jerusalén ne, cavechutaha me ngu profeta xi hmi rë Ahías. Hya ne, tsajin sa yo tjin. Hane Ahías ne, yaha me ngu

tsjian hasu xatsë. Sehe cafaha me tsjian hasu jan, cavatë langa me.
 Tejo rqui cavatë me. Hya xi camá ne, sehe cachja me cojo
 Jeroboam cuitjin:

—Chjehe të rqui langa vi tsëhë tsjian naha ta cuitjin chja Nina.
 Tejo ndihya tjë rë xuta tjë rë Israel má. Nina ne, sahmi me xi ngaye
 cuma ye xuta matitjun tsëhë të ndihya jan. Suaain me cahndë xi
 xuta tjë rë David cjuenduju sa xi cuma me me xi matitjun tsëhë yëjë
 ni xuta jan ta tsëhë xi Salomón ne, quihndi rë me ne, cafarharcun me
 nina ndacha. Vëhë xi sahmi Nina me castigu. Sahmi Nina me
 castigu peru cuechu nixtin xi sacu nga rë me cjuandaja. Xuta tjë rë
 me ne, suva xuta tjë rë Judá xi cumatitjun me tsëhë, ta ndastu ngu
 ladu vëhë ne, Nina sua me cahndë xi sahmi me gobiernu rë ta
 handasa choho casahmi Salomón ne, nima David ne, cavihndë me
 tsëhë Nina. Hacuaha Nina casahmi me ngu compromisu cojo David
 hane sahmicihin jain Nina compromisu jan. Hane sacuaha ngaye
 ne, chja Nina ta sá xi chjehercuin ley rë Nina ne, xuta tjë riji ne,
 cuitexa me nangui Israel hya xi cueye.

Jeroboam vëhë ne, jemu xuta sahmi xa me. Hane Salomón ne, casua me xa xi cumatitjun me tsëhë xa xi sahmi xuta tjë rë Efraín cojo xuta tjë rë Manasés sacuaaha xavasen rë me. Jeroboam ne, hacuaaha tjë rë Efraín má me. Hane camacjan rë me tsëhë xa xi jercu sahmi xicjin me. Vëhë xi casahmitangun me xuta rë me, peru camajin xi meje rë me. Hane ngatsë rë xi cama Jeroboam condra rë me ne, Salomón ne, meje tsiquehen me Jeroboam. Sehe cavanga Jeroboam, quiji me Egipto, hane ngajan cavejña me hisca xi cahme Salomón.

Salomón ne, cavitexa me xuta tjë rë Israel xcun yachan nu. Hane hya xi cahme me ne, ngu quihndi rë me xi hmi rë Roboam ne, cavisehen cha cahndë rë nima nahmi rë cha hane camá cha xuta matitjun tsëhë xuta tjë rë Israel.

Ngatsë rë cjuandya xi camá ne, caticja rë nangui Israel cojo nangui Judá

(1 Reyes 12:1-24; 2 Crónicas 10:1-11:4)

Hya xi cahme Salomón ne, quiji Roboam, quihndi rë me nandya Siquem ta ngajan camatangun xuta cojo sa xi cumá cuisehen me xa xi cuma me me xi matitjun. Hacuaha hya ne, xuta tjë rë Israel xi tjin rë me nangui ladu ngatihin tsëhë Israel ne, catsingatju me cjua tsëhë cjuaveya rë Salomón cojo sa xi cuya Jeroboam tsëhë Egipto. Hane xi cavuya Jeroboam ne, cachja me cojo Roboam ngatsë rë xuta ngarca. Cuitjin cachja me:

—Nu xi cavitexa nima nahmi nuju, jercu tu lnga tujunsa cavechjin. Hndë ticaain niji cojo vëhë. Vëhë xi ¿mé nihñu sá xi ningatihin xi cuma cuitexun niji? ¿Há ninguijnu hitsë tujunsa jan? Sá xi ningujnu ne, ndatjin.

Hya xi camá ne, cachja Roboam xi meje rë me jyan nixtin xi tsingatahacacun me tsëhë, hane sehe tsicuya me cjua. Hya xi camá ne, quiji Roboam cavanguise me cjuatacun rë xuta xi vechu me

cjuatacun rë me xi cavisecoo me nima nahmi rë me. Hane cachja me xi hitsë sa ndaja ne, sahmi me sacuaaha chja xuta. Peru cachuyiin rë Roboam cjuatacun jan. Sehe cachja me cojo cha nixti xicjin me. Hane cha vë jan ne, cachja cha xi cahndë xi tsinguijne me chji rë, cuma cuiji tujunsa xi cuechjitje xuta. Hya xi camá ne, cachuya rë Roboam cjua vë hane cuatjin cachja me cojo xuta. Cuatjin camá xi cavetjucaa cjua xi cachja Nina cojo profeta Ahías, ta hya xi cahndë xuta ladu ngatihin cjua xi catsicuya Roboam ne, cuitjin cachja me:

—Caveni xi chjihincuendin xuta tjë rë nima David. Hitsë sa ndaja ne, hanguin sacuya niji hacutjin ndatjin nihñi ngajñi niji suvin.


Hya xi cajnetaha cjua jan ne, cafe xuta ndava me. Cavejña xi Roboam ne, cavitexa me xuta rë me o sá xuta tjë rë Judá hacuaha cavitexa me xuta tjë rë Benjamín. Nangui rë xuta tjë rë Benjamín ne, quitaha tjeheh rë nangui rë xuta tjë rë Judá. Hacuaha xuta jan ne, hacuiin cjin má me. Hya xi camá ne, jo cahndë ladu canangui vë cafaha ñihi rë nangui Judá, hane ngajan cavitexa Roboam. Yahnga xuta tjë rë Israel ne, cafaharcuin me Roboam. Hya xi catsingatju Roboam xuta xi faha me tujunsa ne, cavetaha xuta me ndyojo hisca

catsiquehen me xuta jan. Sehe casua me Jeroboam xa xi camá me me xi matitjun tsëhë nangui xi cavangui, o sá nangui Israel. Hya xi camá ne, Roboam ne, casahmitangun me sindadu rë me xi sahmi me si cojo nangui Israel cojo sa xi cuya cuma ngu ni cahndë. Peru Nina ne, catsingatju me Roboam cjua xi cafaha profeta Semaías xi hacuiin cuatjin sahmi me. Catejña me hacutjin camá ta cuatjin cavitexa Nina. Hane hya xi camachaya rë Roboam cjua xi cachja Nina ne, cavuya me ndava me cojo yëjë sindadu cjín tsëhë me.

Casahmi Jeroboam gobiernu ladu ngatihin xi hmi rë nangui Israel

(1 Reyes 12:25-14:20)

Hya xi cafë caticja rë nangui ne, cavitexa Jeroboam xuta ladu ngatihin. Hane nandya Siquem, ngu nandya xi satë rë xuta Efraín, o sá xuta xicjin me ne, nandya vëhë camá cahndë rcun rë me, ngajan cavitexa me. Hya xi camá ne, cavetsihin xi jemu hai rë me ta xuta xi cuitexa me ne, tjin rë me xi cuisehen me nangui hiscan vitexa Roboam ta ngajan tacun yungun rë Nina. Xi má rë me ne, cuya xuta tsuvangui me Roboam. Vëhë xi cavejñacacun me xi tsindeya rë me



cjuatacun rē xuta, hane cuisehen ngu xcusun xatsē cojo sa xi ngajan tiña ne, cuma cjuaharcun xuta nina rē me. Casahmi me jo xcusun rē chu ndyaja xi camá tsēhē oro sehe cachja me cojo xuta xi chu vēhē ne, má chu nina, hacuaha chu jan ne, cavaxē chu me tsēhē nangui Egipto. Cachja me xi tu mahya xi cjue me Jerusalén xi sua me cjuatjo rē Nina ngajan. Sehe ngu chu ndyaja vēhē ne, cavejña me ngu ngu ladu rē nangui xi cavitexa me. Cavejña me ngu hiscan nandya xi hmi rē Dan, hane chu xi má jo ne, cavejña me nandya xi hmi rē Betel. Cuatjin camá xi xuta ladu vēhē ne, cahndiin me tsēhē Nina hane cafaharcun me nina ndacha. Hane Jeroboam ne, cafaha me tu yo ni xuta ngarca ni xi cumá me nahmi rē cjuatacun vē.

Hacuaha cavaxēcun me ngu suhi xi cuma rē nina ndacha vë hya xi cuetjucaa sa xi má jyin tsēhë jima ngu nu.

Nixtin tjun rē suhi jan ne, Jeroboam ne, quiji me catsiquehen me chu xi sua me cjuatjo cojo nina ndacha vë. Hane jinguyējë rē xi tisahmi me ne, cafehe ngu profeta xi canduva me tsēhë ladu rē Judá. Sehe cuitjin cachja profeta vë:

—Tinohe cjua xi tjin ná xi cuichja. Cuechu ngu nixtin xi cuinduva ngu xuta tjë rē David tavihi. Hane me vëhë ne, tsiquehen me nahmi xi cuaca me cjuatjo xcun ngasunscun vihi. Hisca ninda rē xuta cuaca me xcun ngasunscun vihi. Cumachjiriin sacuaha ngu cahndë ximinchacun hane cumachjiriin xi sua me chu cjuatjo xcun. Tjin nuju cjuaquixi xi cuetjucaa cjua vi ta tichja Nina xi sahmi me xi cuetsun ngasunscun vi quihndë.

Hya xi cahndë Jeroboam cjua xi cachja profeta jan ne, jemu cacjan me cojo. Hisca cachja me cojo xuta rē me xi cjuaha me profeta jan. Peru hora xi tifunihnga me tsja me xi tsingacuntsja me ne, tsja me ne, caxihñu. Hacuaha ngasunscun jan ne, cafë catiya

ndyojo rë, hane ndesu rë ne, cavixu. Sehe cachja Jeroboam cojo profeta jan cuitjin:

—Nihñu favor xi chjayun rë Nina cjuandaja cojo sá xi cumandaja ntsan.

Camandaja tsja me. Peru quijinduju me casahmi me cjuatsehen condra rë ley rë Nina. Hacuaha quijinduju me xi casua me xa xuta xi cuma me nahmi, handasa hacuiin xuta tje rë Leví má me.

Cavatju sa nixtin. Hya xi camá ne, Abías, cha quihndi rë Jeroboam ne, cama hmu rë cha. Hane xi meje scuëë me mé cuma rë quihndi jan ne, Jeroboam ne, catsingatju me chjuun rë me xi cjue cuichja na cojo profeta Ahías. Ahías ne, hacui profeta xi tjun cachja me cojo Jeroboam xi cumá me xuta matitjun. Nixtin hya ne, ha cama changá Ahías, hacuaha camá rca me. Hacuaha chjuun jan ne, catsindeya na xcusun rë na. Peru Nina cachja me cojo Ahías yo na xi nduva. Xi tu cafehe na hiscan tacun Ahías ne, cuitjin cachja me cojo rë na.

—Tu mahya xi canindeye xcusun riji ta hvē ta ngaye ne na chjuun rē Jeroboam hacui ngaye. Jercu choho cun cjua xi tjin ná tsiji. Tjihi tinóje cojo xihin riji cjua xi Nina cachja me. Cuitjin cachja me: Ngatsē naha xi camá ngaye me xi matitjun, peru ngaye ne, canihñicuendi rē cjua naha. Hitsē sa choho canihñi xi cuma rē tu yo sa xuta xi tjun caviyuju xi cuma ri. Hacuini suva ni xi cachjiincuendiin cjua naha ta hacuaha cachjehercuin nina ndacha. Vēhē xi sacuaha xuta tje riji ne, sacuiin ri, ta cueya yējē cha xihin. Cuatjin nóje cojo xihin riji ta cuatjin chja Nina. Tjihin ndya riji peru xi cjuehe ngajan ne, hora hya ne, cueya quihndi jan. Cha vēhē tjun cha cueya cha xi cuma rē quihndi xihin riji xi cueya, ta cuetjucaa cjua xi cachja Nina. Cuechu nixtin xi cuejña Nina ngu me xatsē xi cuma me me xi matitjun nangui nuju. Hane me vēhē ne, tsiquehen me yējē xuta tje nuju xi xihin má. Hane xi cuatjun vēhē ne, hacuaha cojo xuta xi cuitexe cuma me castigu ta xutaxin ne, cuinduva me xi sahmi me si, sehe cjuecojo me xuta nangui nuju nangui rē me xi cumá me mosu hndixahan rē me. Cuma me castigu ngatsē rē xi cjuenduju sahmi me cjuachoho xi cavetsihin casahmi me nixtin xi cavitexa Jeroboam.

Hya xi camá ne, cavuya na cafe na ndava na. Hane xi tu cafehe na ndava na ne, cahme quihndi rē na. Hya xi camá ne, can jo nu cavitexa Jeroboam xuta ladu ngatihin. Hane hya xi cahme me ne, ngu quihndi rē me xi hmi rē Nadab cavisehen me cahndē rē me.

**Cavetsihin xi chuva ngu chuva ngu me ne, camá me
gubiernu rē ladu ngatihin o sá nangui Israel:
tjun ne, Nadab, sehe Baasa, sehe Ela,
sehe Zimri, hane sehe Omri**

(1 Reyes 15:25-16:28)

Nadab, quihndi rē Jeroboam ne, caca rē me cavitexa me xcun jo nu ni. Cahndii me cjua rē ley rē Nina hacuaha cavetjungui me yějē xcusun chocun xi casahmi nima nahmi rē me. Camá xi ngu ndiya hya xi tisahmi me si condra rē xuta filisteo ne, ngu cha capitán rē sindadu cjín rē me xi Baasa hmi rē cha ne, cavuya cama cha condra rē me. Sehe catsiquehen cha me hane cafaha cha xa xi cuitexa cha. Hane cojo sá xi tsajin yo xuta tjē rē Jeroboam cumá

sahmi me condra rē cha ne, catsiquehen cha yējē xuta tjē rē Jeroboam.

Cha Baasa ne, can űuju nu caca rē cha xi cavitexa cha xuta ladu ngatihin. Nandya xi hmi rē Tirsa ne, ngajan camá cahndē rcun rē cha. Cha vēhē ne, hacuiin xuta ndaja ta ngu tangun ni xcusun rē cha sacuahā xcusun rē xuta tjē rē Jeroboam. Vēhē xi catsingatju Nina cjua rē cha xi cafahtsja profeta Jehú. Cuitjin cachja cjua: “Casuá ri cahndē xi cuitexe. Peru ngu tangun ni xcusun riji cojo xcusun rē Jeroboam. Vēhē xi hacuahā tangun ni cuma xuta tjē riji sacuahā xcusun xi canihñi cojo xuta tjē rē me vēhē.” Cuatjin cachja Nina. Hya xi cahme Baasa ne, ngu quihndi rē cha xi hmi rē Ela ne, cavisehen cha cahndē rē nima nahmi rē cha.

Cha Ela ne, jo ni nu caca rē cha cavitexa cha. Hya xi camá jo nu vēhē ne, Zimri, ngu capitán rē sindadu cjin rē cha ne, camá catsiquehen rē cha hacuahā cavisehen me cahndē rē cha. Sehe Zimri ne, catsiquehen me yahnga xihin tjē rē Baasa. Peru Zimri ne, ngu ni totje cavitexa me xuta ta hya xi camachaya rē sindadu cjin mé xi camá ne, cavaxijin me ngu capitán xi hacjahi xi cuma me me xi

matitjun. Capitán jan ne, Omri hmi rē. Sehe quiji sindadu cjin jan xi cjuejaha me Zimri. Peru Zimri ne, cavetaha me ndihi ngajan ndihya hiscan sahmi me gobiernu. Hane tsēhē xi caseya me cahntsua ndihya jan ne, cahme me ta cati me.

Hane Omri ne, caca rē me tejo nu xcun xa jan. Hitsē sa cjin xcusun chocun casahmi me xi cuma rē yahnga xuta xi camatitjun me. Catsitsehen me xuta xi cjuaharcun me nina ndyojo. Me vēhē camá xi cavatsē me naxi xi cafaha ñihi rē Samaria, hane sehe ngajan camá cahndē rcun rē nangui Israel. Hya xi cahme me ne, cavisehen cha quihndi rē me xi hmi rē Acab.

**Ladu canangui, ngajan tjun cavitexa Roboam,
sehe cavitexa Abías, hane sehe cavitexa Asa**

(1 Reyes 14:21-15:24; 2 Crónicas 11:5-16:14)

Camá jo cahndē nangui Israel, hane Roboam, quihndi rē Salomón ne, tjun camá me me xi matitjun tsēhē Judá, cahndē canangui. Xi tjun tjun casahmi me ne, casahmi me xi nandya rē me ne, tjeru hñu cuejña. Cuatjin casahmi me cojo sa xi tsajin yo cuma

cjuahaxin rē me xa xi cafaha me. Vēhē xi casahmi me ngahñu rē nandya xi siu ladu rē me. Caviyujuhñu yējē sacuahā hñchua ndyojo xi tjin jingu tahndee rē, hacuahā cavinchandaja me quicha xi cjuaha xicjin cojo me. Hacuahā cavinchandaja me comida cojo sa xi scaa rē xuta rē me sá xi cuinduva xuta condra rē me. Scaa rē me ta tjin mé xi cuma meje rē cahntsua nandya.

Sacuahā hya ne, cafehe yējē nahmi cojo yējē sa xuta tjē rē Levi ngajan ladu canangui ta casacuiin rē me cahndē taha ngatihin xi ngajan sahmi me xa rē Nina. Casacuiin rē me ta Jeroboam ne, tjin rē me nahmi tsēhē xcusun rē ndyaja xi casahmi me, peru hacuiin xuta Leví. Vēhē xi cafehe xuta tjē rē Leví taha canangui hacuahā cafehe yahnga xuta xi meje cjuaharcun me Nina xi cjuaquixi. Cafehe me handasa tjin rē me nangui rē me taha ngatihin. Cafehe me caviyuju cahndē me taha canangui ta meje sua me cjuatjo cojo Nina cahntsua yungun tsēhē Jerusalén. Hane xi cafehe xuta vē ne, hitsē sa cjin camá ngahñucjua rē nangui Judá. Hacuahā jyan nu xi tjun cavetsihin sahmi xa Reboam ne, ndaja casahmi me. Hane cojo xi ndaja casahmi me ne, cavisecoo rē me Nina xi nangui vēhē ne, cuma ngu nangui hñu.

Peru xi cavaŋju sa nu ne, Reboam ne, cavindeya xcusun rē me. Hane cahndiin me cjua rē ley rē Nina. Hacuaha cojo yējē xuta ladu vēhē ne, cavetsihin casahmi me ngasunscun tsēhē nina ndacha, hane nina jan ne cafaharcun me. Hacuaha ngajan ngasunscun jan ne, siu xuta xihin xi casahmi me cjuatsehen cojo xuta xi canduva me cojo cjuatjo rē me. Nixtin tjun ne, Nina cafahaxin me nangui rē xuta cananeo ta casahmi me cjuatsehen vē sehe casua me xuta tjē rē Israel. Peru nixtin rē Reboam ne, camá xi xuta tjē rē Israel jan ne, tangun tisahmi me sacuaha casahmi xuta cananeo jan. Hya xi tjin rē hñú nu xi casahm1 Reboam gobiernu xcun nandya Judá ne, cafehe me xi matitjun tsēhē Egipto cojo sindadu cjín rē me hane cafaha xicjin me cojo sindadu nandya Judá. Hane sindadu egipto ne, camá cavisehen me nandya hñu xi catsindaja Reboam cojo hnhua ndyojo xi tjin jingu tahndee rē. Hacuaha tivisehen me Jerusalén. Sehe cafehe profeta Semaías hane cuitjin cachja me cojo Reboam hacuaha cojo xuta xa rē me:

—Nina cachja me ta, ngayun ne, canismutacun ná, nihñucuenduun cjua rē ley naha, vēhē xi quihndē ne, hacuaha tsismecacún nuju cojo sa xi cuatjun cjuañihi. —Cuatjin cachja Nina.

Hya xi canuhya rē xuta rcun cjua vēhē ne, jercu choho camá rē me ta tsinguitsjen me xi choho jain casahmi me ta caviyujuxin me cjua rē Nina. Hane ngatsē rē cjuachoho rē me ne, cavuya Semaías quiji cavutsejen nga me xuta jan. Hacuaha yaha nga me ngu cjua xi casua Nina. Cuitjin chja cjua jan:

—Cavēē Nina xi ninguitsjun xi choho canihñu hane choho camá nuju. Vēhē xi suaain me cahndē xi me xi matitjun tsēhē nangui Egipto ne, tsinguetsun camahani me Jerusalén. Handasa cuisehen me Jerusalén, peru cuetjuntjun ngajñi rē cjuañihi vē. Hane sehe tjin nuju xi cuechjun tujunsa cojo xuta matitjun tsēhē Egipto. —Cuatjin cachja cjua xi catsingatju Nina.

Hya xi camá ne, cavisehen me xi matitjun tsēhē Egipto nandya Jerusalén cojo sindadu cjín rē me. Sehe quijicojo me yējē cjuanchina xi casahmi nima Salomón xi cumá rē yungun cojo sá xi cumá rē ndava suva me. Hya xi camá ne, Roboam ne, cavuya casahmi nga me xcusun xi quijicojo xuta jan peru hindē hacuiin oro camá ta casahmi me tsēhē quicha sine. Hane xi cajnetaha tyjuhunjo nu xi casahmi Roboam gobiernu nangui Judá ne, sehe cahme me.

Hane cha Abías, quihndi rē me ne, cavisehen cha xa rē nima nahmi rē cha.

Cha Abías ne, cahndiin cha cjua rē Nina. Peru Nina ne, casua me cha cahndē xi cavitexa cha ta tjin cjua cojo nima David, nchava rē cha. Sahmichihin Nina cjua vē, ta nima David ne, cahndē me tsēhē Nina yējē nixtin rē me. Suva hya xi cachja nima xi cueya Urias xi scutaha nima chjuun rē cha, hya ni xi cahndiin nima tsēhē Nina. Hane hya xi cavitexa Abías jan ne, sama jercu choho caviyuju me ta jiya si cojo Jeroboam, xuta matitjun tsēhē Israel. Hane tsēhē Abías ne, macjain rē me Nina ne, Nina cavisecoo rē me xcun si. Hane cojo si jan ne, cafhataha cafhataha me ngujo nandya rē nangui Israel. Abías ne, cahme me hya xi sehe jyan nu má me xuta matitjun. Hane ngu quihndi rē me xi hmi rē Asa ne, camá me xuta matitjun.

Asa ne, ngu xuta matitjun ndaja me. Casahmi me sacuaaha chja cjua rē Nina. Catsinguetsun me ngasunscun xi casahmi xuta xi cafharcun me nina ndacha. Sehe cavitexa me xuta xi cjuaharcun me suva ni Nina cjuaquixi hacuaha cuihndē xuta cjua rē ley rē Nina.

Hya xi nu titjun xi casahmi Asa gobiernu rē nangui Judá ne, tsajin yo xi meje sahmi si cojo me. Hane cojo cjuajeya vē ne, cavuya casahmi nga me ngahñu rē nandya. Catsindaja me hnhua ndyojo xi siu tahandee rē hacuaha casahmitangun me sindadu cjin. Hya xi camá ne, cafehe sindadu cjin tsēhē ngu nangui xi hmi rē Cus xi sahmi me si cojo sindadu tsēhē nangui Judá. Peru Asa ne, cafehya me Nina xi cuisecoo me xuta tsēhē Judá. Sehe Nina cavisecoo me me, hane caca rē me xcun si. Hya xi tivuya Asa ndava me ne, profeta Azarías ne, cavechutaha me ndiya. Sehe cachja me cuitjin:

—Hya xi nihñucuendun rē cjua rē Nina ne, sacu nuju cjuandaja rē Nina, hane cuisecoo me yun.

Cuatjin ne, quijinduju sa Asa catsinguetsun me nina ndyojo cojo ya rē xi casahmi xuta. Hisca cojo ngu ya xi cavitexa chicuhun rē me xi camá, hane cavetaha me ndihi xi cjuēya ya vē. Sehe cakahataha me ngahñu xi satē rē chicuhun jan sacuaha xuta rē me xi matitjun. Hya xi camá ne, cavacun rē xuta xi Nina ne, tivisecoo rē Judá. Hane jercu cjin xuta ladu rē Israel cafehe caviyujucandē me nangui Judá.

Xi cavatju cjín nu ne, Baasa, me xi matitjun tséhë Israel, cojo sindadu rê me ne, cafehe cafaha xicjin me cojo xuta Judá. Hya xi camá ne, Asa ne, cafaha me tujún tséhë yungun cojo tujún tséhë suva me hane catsingatju me tujún jan xi cjuahatsja xuta xi matitjun tséhë Siria cojo sa xi cuisecoo me xcun si. Hya xi camá ne, cavisecoo jain me ta sindadu rê nangui Siria ne, quiji cafaha xicjin me cojo xuta tséhë Israel. Hane cojo si vëhë ne, camajin si cojo xuta Judá. Peru Nina ne, camacjan rê me cojo Asa. Vëhë xi catsingatju me profeta Hanani xi cachjataha me Asa cuitjin:

—Cuitjin chja Nina: Hitsë sa ndaja sa xi caningatehetacuin xi ngahan ne, cuisecoo ri sacuatjin cavisecoo ri xi caca ri cojo sindadu cjín tséhë Cus. Peru cahndë rê xi cuatjin nihñi ne, camacjaain ri ngahan quihndë. Ngahan ne, vutséjen yëjë xi sahmi xuta, hane sá xi tjin yo xi faharcun ná, hacuaha visécoo rê me. ¿Mé cjuangarca canihñi? Ngatsë rê cjuangarca jan ne, suá cahndë xi quihndë cojo nixtin xi cjueniji sa nihñi gobiernu ne, cuma sa cjín si cojo ri.

—Cuatjin chja Nina.

Hya xi cahndë Asa cjua vëhë ne, jercu cama cjan camahani rë me cojo profeta Hanani. Hisca cavitexa me xi quiji Hanani ndavaya. Xi cavatju sa nixtin ne, jemu camahmu ntsacu Asa. Peru cafehyaain rë me Nina xi cumá ndaja ntsacu me. Hane xi cavatjun jo sa nu ne, cahme me. Yëjë nu xi cavitexa Asa ne, yachan ngu nu camá. Hane hya xi cahme me ne, ngu quihndi rë me xi hmi rë Josafat camá cha me xi matitjun.

**Elías ne, cavinchajyë me Acab, xuta matitjun
tsëhë nangui Israel**

(1 Reyes 16:29-19:21)

Chaja sa ngujo nu xi cueya Asa me xi matitjun tsëhë Judá ne, cahme Omri, me xi matitjun tsëhë Israel. Hane hya xi cahme me jan ne, ngu quihndi rë me xi hmi rë Acab ne, cavisehen me xa xi má me xuta matitjun jan. Acab ne, jemu choho camaha ni xcusun rë me. Hitsë sa choho xcusun rë me xi cumá rë yahnga xuta matitjun xi choho casahmi me. Ngu xcusun xi casahmi me xi hitsë sa vatjutaha chojyihi ne, cavixan me cojo ngu chjuun xutaxin xi hmi rë Jezabel. Na vëhë ne, quihndi rë me xi matitjun tsëhë nangui Sidón má na.

Xcusun rē xuta nangui Sidón ne, faharcun me ngu nina ndacha xi hmi rē Baal. Hane ngatsē rē xcusun rē chjuun rē me ne, hacuaha cafaharcun Acab nina ndacha vë. Hacuaha nandya matitjun o sá nandya Samaria ne, ngajan casahmi me ngasuncun xi cuma tsēhē Baal. Hacuaha chjuun jan ne, catsingatjun na xuta xi catsiquehen me profeta xi sahmi me xa rē Nina. Nixtin hya ne, ngu me xi hmi rē Abías cavitexa me ndava Acab. Hane me vëhē ne, macjain rē me Nina. Vëhē xi quijicojo me ngu cientu profeta cjuaquixi jan, cavinchahma me profeta jan cahntsua ngu nguijo. Hacuaha quijicojo me mé xi sinē cuihi profeta jan.

Hacuaha nixtin hya ne, tacun ngu profeta rē Nina ngajan nangui Israel xi hmi rē Elías. Cavechu ngu nixtin xi quiji cachja me cojo Acab cjua vihi:

—Xa rē Yahvé tejña ngajan. Me vëhē xi Nina xi cjuaquixi. Hane cojo ngahñu rē me ne, tichjá cojo ri xi cuaain tsi nchujun nguini. Cuma quixi nangui hisca xi suá cahndē xi cuaha tsi.

Hya xi camá cachja Elías cjua vëhē ne, sehe cachja Nina cojo me xi cjue cuejñahma me tiña ndajyē lihndi xi hmi rē Querit. Hane



Elías ne, cuatjin casahmi me.
 Tsajin comida xi sacu rē me taha
 vēhē. Vēhē xi jinguyējē rē xi
 cavejña me ngajan ne, chu
 chenda cafehe cojo chu mé xi
 jinē me. Hane sacuahā Acab ne,
 ta cavatju jain cjua xi cachja
 Elías ne, hatuxa cavangui me
 Elías, peru camajin casacu rē me.
 Cavejña Elías ngajan Querit
 hiscan xi caxiya nanda lihndi xi
 vanga ngajan. Sehe cachja Nina
 cojo me xi cjue me ngu nandya
 tiña tsēhē Sidón, hane ngajan
 cuejña me ndava ngu na cahan.

Quiji Elías hiscan cachja Nina. Hya xi tu cafehe me ladu vēhē ne,
 cavēē me ngu na cahan xi tifaya na chaquin. Hya xi camá ne,
 cafehya me na xi sinē me. Hane na cahan jan ne, cachja na ta
 cumajin ta stetaain xi sua na me. Xi tjin rē na ne, hinchā hitsē scuan

rë pan cojo hitsë aceite xu. Hane cojo vëhë ne, cumá xu ngu pan lihndi xi cuma ngu ni comida rë suva na cojo quihndi rë na.

Hane Elías ne, cachja me xi ndatjin, peru tjun cumá ngu pan xi sinë me, hane sehe cumá ngu xi cachja na. Sehe cachja me xi sá xi sahmi na sacuaaha xi cachja me ne, Nina sahmi me xi scuan rë trigu jan cojo aceite jan ne, scaa rë tsicjen catsijyan me hisca hya xi cuaha tsi. Hya xi camá ne, nchunchujun ni tjun casahmi na pan xi cumá rë Elías, hane sehe casahmi na pan xi cumá rë na cojo quihndi rë na. Hane scuan rë pan cojo aceite jan ne, nchunchujun ni tu cuanitjin ne, hinchah hitsë.

Ngu nixti xi cavejña Elías ndava na vëhë ne, jemu camahmu rë quihndi rë na. Hane cahme cha. Hya xi camá ne, Elías ne, cafehya me Nina cjuandaja rë me xi cuisecoo me xuta xi cafhatsja me me. Sehe cavetahacoo me hntsua me cojo cha nixtin jan, sehe cachjinuxmatjo me. Hane cha nixtin jan ne, cavuya xta nga rë cha. Hane naa rë cha ne, cavacun rë na xi Elías ne, hatuxa sahmi me xa tsëhë Nina cjuaquixi. Hacuaha quixi xi profeta má me.

Cavatju jyan nu cavaain tsi, hane jemu jyë camá jindya ngajan nangui Israel. Hane Acab, xuta xi matitjun ne, tivanguise cuaha me Elías yějě ni ladu. Hane xi camá jyan nu jan ne, cachja Nina cojo Elías xi cjue tjengui me Acab hane sua cumachaya rě me xi cuaha tsi. Cuatjin casahmi Elías. Hane xi tu cavěě Acab Elías ne, cuitjin cachja Acab cojo me:

—Hacutjin ndaja xi cavoye ngaye. Jemu jyë cjuañihi cavinche xuta naja.

Hane cuitjin cafayangui Elías:

—Hacuiin xi cun ná xi camá cjuañihi vë ta xi cun ri cojo xi cun rě xuta changá riji. Xi cun nuju ta cavinuhyuun cjua rě ley rě Nina ta nina ndacha Baal xi cachjuhuncun. Sacu naja cjuaquixi yo xi cun rě. Tinóje cojo xuta xi cjueniji me ndetjun xi hmi rě Carmelo. Hane cojo ngaye, hacuaha ngajan cuihi cojo profeta rě Baal. Ngajan sacu naja cjuaquixi.



Hane Acab ne, casahmi me sacuaha cachja Elías. Ngajan quiji me cojo profeta rē Baal. Hacuaha ngajan camatangun xuta. Hane hya xi cafehe yějě ni me ne, cuitjin cachja Elías cojo me:

—Xi má ná ne, meje rē xi tejñuhñu cjuatacun nuju. Xi ngu ndiya xa ni ne, chuxujun jarē Nina xi cjuaharcun. Sá xi Baal má me Nina cjuaquixi ne, chjuhunrcun me. Peru sá xi Yahvé má me Nina xi cjuaquixi ne, chjuhunrcuun nina ndacha.

Hya xi camá ne, tsajin mé cachja xuta. Hane Elías ne, quijinduju cachja me cuitjin:

—Ngu tutu ngahan tejña cuaha sacuaha profeta rē Yahvé. Peru ladu rē profeta rē Baal ne, ñuju cientu vasen má me xi camatangun me nguehe. Tsajin rqui rē ta quihndē ne, cumatsejen yo xi Nina jain. Nduvuncujun jo chu ndyaja. Ngu chu tsēhē me vēhē hane ngu tsahan. Hane nihñi jo ngasuncun. Sahme ngu, hacuaha sahmi me ngu. Hya xi cumá ne, niquihin chu jan, sehe cuiyuju chu ngu ngu chu xcun ngasuncun hacuaha xcun chaquin rē. Cuatjin nihñi peru hacuiin cojo ndihi setaha rē. Hya xi cumá cuatjin ne, sehe chjindayin rē nina niji cojo sa xi cjuahacuenda me tsijin hane scandi me ndihi. Hane sá xi scandi jain me ndihi xi cuaca rē yojo rē chu cjuatjo rē me ne, ngajan tsejen xi nina vēhē ne, má me Nina xi cjuaquixi. —Cuatjin cachja Elías cojo xuta.

Hane xi cahndē xuta cjuar rē Elías ne, cachja me ta ndatjin. Hya xi camá ne, Elías ne, tjun casua me cahndē xi profeta rē Baal scuxijin cha jarē chu ndyaja xi chuya rē cha xi cumá cjuatjo rē me. Sehe cha xi cuacun jan ne, casua cha chu cjuatjo cojo nina rē me.

Hacuaha casahmi cha yějě mé xi sahmi cha sacuaha xa rě cha. Cha vėhě ne, nguitajñu ne, cavetsihin casahmi cha hane quiijinduju casahmi me hiscan nchisen. Peru tsajin mé camá. Hisca ngu ndihi cafaain rě. Hane xi camá nchisen ne, Elías ne, cavetsihin tsixcuehyu me cha xi cuacun jan. Cachja me cojo rě cha xi hñu sa squindaya cha ta tsejen xi tinuhyaaain rě nina rě cha cjua rě cha. Cachja me ta cumá xi tjin mé xi titsingatahacacun Baal, o sá tjin me xa xi tisahmi me, o sá quiji tsujyihya me, o sá jiñafě me. Hane cajindaya hñu cha hacuaha cavatě cha yojo rě cha cojo quicha cojo lanza ta xi má rě cha ne, cuatjin meje rě nina rě me. Hane cuatjin caxinchataha cha casahmi cha hisca cajne hora. Peru caveni casahmi cha ta ndastu mé camá.

Hane xi cajne hora ne, Elías ne, casahmi me ngasunscun xi cumá rě Yahvé, hane cavėhëndaja me yějě xi cuma meje rě tsėhě. Sehe casahmi me ngu xanga tahndee rě ngasunscun. Sehe catsicahnchi me ngasunscun. Tjemu cjín camaha ni nanda catsicahnchi me ngasunscun cojo. Hane cavahnchi yějě ni cojo chu cojo chaquin sehe catsě rě xanga cojo nanda xi cavanga. Sehe hya



xi cavechu hora xi hatuxa sua xuta cjuatjo cojo Nina, hya cachja
Elías cojo Nina xcun xuta jan. Cuitjin cachja me:


—Ngayun Yahvé, nihñu xi nixtin quihndë ne, yějë xuta vihi ne,
scuëë me xi ngayun Nina xi cjuaquixi hane ngahan ne, sahme xa
nuju sacuaha ngu mosu hndixahan nuju.

Hane xi sehe cajnetaħa cachja Elías ne, cacandi Nina ndiħi tsěħě ngahnga. Hane ndiħi jan ne, ha ngu ndiya ne cavaca rě cjuatjo cojo chaquin hnchi rě, hane catsixi yějě nanda jan. Hane xi tu cavěě xuta mé camá ne, sehe jemu quiĵircun rě me hane cuitjin cachja me:

—¡Yahvé, me vėħě hacui me Nina cĵuaquixi!

Sehe cuitjin cachja Elías cojo xuta jan:

—Sá xi cuatjin ne, chjuhun yějě profeta rě nina ndacha vė.
Tuun cahndě xi cuatjuhnga hisca ngu cha.



Hane xuta jan ne, cafaha me profeta jan. Sehe catsiquehen Elías profeta jan nixtin hya ni.

Hya xi camá ne, cachja Elías cojo Acab xi meje rë xi xati sahmicacun me xi cjue me ndava me ta cuaha tsi sane ndiya cjuaha rë me tsi. Hora hya ne, hisca ngu yufi tsajin ngahnga. Cafe Acab ndava me hane nixtin hya ne, jemu hñu cavaha tsi. Hane xi cafehe Acab ndava me ne, casuacuenda me chjuun rë me mé camá. Hane na Jezabel jan ne, camacjan rë na xi catsiquehen Elías profeta rë Baal o sá nina rë na. Sehe catsingatjun na cjua rë Elías xi sahmicacun na xi cueya Elías xi chaja sa cavatju ngu nixtin. Xi tu casacu rë Elías cjua jan ne, cavatju me nangui Israel, cavatjucjin me nangui Judá hane quiiji sa me taha ladu canangui hisca xi cafehe me naxi Sinaí. Hane ngajan ne, casacu rë me ngu nguijo xi caseya me cafañafë me. Hya xi camá ne, Nina ne, cavinenguise me Elías mé tsëhë xi tivanga me. Hane cuitjin cachja Elías:

—Tivánga ta ngu tu tu ni ngahan xi téjña xi faharcun nuju, hane hiscan ngahan ne, meje tsiquehen me ngahan.

Sehe cuitjin cachja Nina:

Tihin hiscan xi candove. Nóje cojo cha Eliseo xi cuma cha profeta naha ngascan riji. Hacuaha tejñuhñu cjuatacun nuju ta yatu mil sa xuta siu me ngajan nangui Israel xi faharcuiin me Baal.

Hya xi camá ne, cavuya Elías nangui Israel. Sehe hya xi casacu xicjin me cojo Eliseo ne, cavesun me tsjian rě xa rě me xcun rcu tyja rě Eliseo. Hane xi cavatju ngujo nixtin sa ne, quiji cavejña Eliseo cojo Elías xi cuisecoo me me.

**Casua Acab cahndě xi cavatjuhnga ngu me xi matitjun,
hane cachja Elías cojo me xi cuma me castigu**

(1 Reyes 20-21)

Ngu yějě rě xi vitexa Acab nangui Israel ne, me xi matitjun tsěhě nangui Siria, ngu me xi hmi rě Ben-adad ne, casahmi me si cojo Samaria nandya rcun rě Israel. Hane hya ne, catsingatju Nina ngu profeta xi cachja me cojo Acab. Cuitjin cachja profeta jan:

—Vihi cjua xi cachja Nina: Cuisécoo rē sindadu riji scaa rē me cojo sindadu nangui Siria. Cuisécoo rē me cojo sá xi tsejen xi ngahan Nina cjuaquixi.

Hya xi camá ne, cuatjin camá ta caca rē sindadu nangui Israel. Peru sehe cavuya cafehe sindadu nangui Siria casahmi nga me si cojo sindadu nangui Israel. Hane profeta jan ne, cavuya nga me, sehe cachja nga me cojo Acab cuitjin:

—Vihi cjua xi cachja Nina: Cuya sahme nga xi sindadu nangui Israel ne, scaa rē me cojo sindadu nangui Siria.

Hane cuatjin camá nga ngu ndiya. Peru hya ne, cojo Ben-adad cama cafaha sindadu nangui Israel. Peru Ben-adad jan ne, cachjatjo me xi tsiquiin sindadu me. Hane Acab ne, casahmi me ngu compromisu cojo Ben-adad, hane sehe casua me cahndē xi quiji me. Peru camacjan rē Nina cojo Acab xi cuatjin casahmi me, hane catsingatju nga me ngu profeta. Cuitjin cachja profeta xi majo vē cojo Acab.

—Vihi cjua xi chja Nina: Ngaye ne, caninchatehe cjuahñu rë cha xi meje rë xi cueya cha, vëhë xi cueye cahndë rë cha.

Hya xi camá ne, jemu camacjan rë Acab. Sehe quiji me cahndë rcun rë me.

Acab ne, hacuaha tacun rë me ndava me hiscan ngu nangui xi hmi rë Jezreel. Hane tiña ndihya jan ne, tjin ngu nangui hisca xi xi camatjë uva xi tsëhë ngu cha xi hmi rë Nabot. Nangui vëhë ne, casatë rë xutachanga rë Nabot hya xi cavatëcja nima Josué nangui rë Canaán cojo sa xi jima ngu xuta tjë rë Israel cafaha me nangui xi casatë rë me. Acab, me xi matitjun jan ne, meje cuatsë me nangui vë cojo sá xi tsitjë me xca chine ngajan. Peru nangui vë ne, jemu hatsëë sahmi xa cojo xuta rë Nabot hane miji cuiteña me. Ngajan xi Acab ne, jemu camacjan rë me, hane xi cafehe me ndava me ne, hisca miji sinë me niñu. Hane xi cavutsejen na chjuun rë me tsëhë xi jemu xti rë me ne, cavinenguise na me mé camá. Sehe cachja me cojo na mé xi maxti rë me. Hane na Jezabel, na chjuun rë me ne, cachja na cojo me ta tu mé ni xi meje rë xahasen rë me ne, sacu rë me ta xuta matitjun me. Sehe cachja na xi sacu rë na nangui vë hane



sua na me. Sehe catsihindu na ngu xujun xi catsingatju na xuta xa rë nandya Jezreel. Cachja xujun jan xi meje rë Acab xi sacu rë me jo xuta xcuahya xi cuinchajyë rë cha Nabot. Handasa cjuandesu peru cuichja xuta jan xi catsixcuehyu Nabot Nina hacuaha catsixcuehyu cha Acab. Meje rë na xi cuinchajyë me Nabot cuatjin ta cojo sa xi cuatjin ne, tsiquehen xuta Nabot cojo ndyojo. Jemu jyë jyê xi tsixcuehyu xuta Nina hane cueya xuta xi cuitjin sahmi me. Hacuaha xcusun rë ley rë xuta israelita ne, meje rë ndastu jo xuta cuincha jyë me ngu xuta hane sehe cuma castigu. Hane xi camá catsihindu na carta jan ne, cavisane na sellu carta jan cojo sellu rë Acab, me xi

matitjun. Sehe catsingatju na xujun cojo xuta jan. Hane xuta jan ne, casahmichihin me cjua xi cafahatsja me. Hane hya xi cahme Nabot ne, casua xuta jan camachaya rē na Jazabel tsēhē cjuaveya rē cha. Hane na vēhē ne, cachja na cojo Acab xi ha cahme Nabot, vēhē xi cuma cjuaha me nangui rē nima. Hane cuatjin camá, ta cafaha me. Hya xi camá ne, Nina ne, catsingatju me Elías xi cuichja me cojo rē Acab cuitjin:

—Cjua vihi ne, Nina ne, catsingatju me xi chjehentse: Ngaye cueye. Hane hya xi cueye ne, xtundi jni riji nangui, hane sehe cuinduva chu naña xi chimajnu chu jni riji sacuaha casahmi chu cojo jni rē Nabot. Tsejen xi ngaye ne, jemu hngatacuin xi choho nihñi. Vēhē xi sacuaha cafē yējē xuta tjē rē nima Jeroboam cojo nima Baasa ta choho casahmi nima xi matitjun jan ne, hacuaha cjuē tjē riji.

Hane hya xi cahndē Acab cjua vēhē ne, cavacun rē me xi choho jain casahmi me hane jemu choho camá rē me. Hane ngatsē rē xi choho camá rē me tsēhē jyē rē me ne, catsingatju nga Nina cjua cojo Elías xi hacuiin ngutjen cumá vēhē ta hisca hya xi cueya me. Hane

cuissehen ngu quihndi rē me xi cuma cha xuta matitjun tsēhē nangui Israel.

Josafat ne, sahmi me gobiernu nangui Judá

(1 Reyes 22:1-50; 2 Crónicas 17:1-21:1)

Ngu yējē rē xi Acab má me xuta matitjun tsēhē nangui Israel ne, Josafat, quihndi rē nima Asa ne, camá me xuta matitjun tsēhē nangui Judá cahndē rē nima nahmi rē me. Hane Josafat ne, jemu ndaja cavisehen me xa. Cahndē me tsēhē ley rē Nina hacuaha cafehya me cjuatacun rē Nina cojo sa xi cuitexa ndaja me. Hacuaha caviyuju hñu me ngahñu xi vaxētje rē nangui Judá. Hane Nina ne, cachuya rē me mé xi casahmi Josafat. Vēhē xi Nina ne, casahmi me Josafat ngu xuta nchina xi jemu hñucjua. Hane Josafat ne, catsinguetsun me ngasunscun hisca faharcun xuta nina ndacha hacuaha catsiquehen me cha xi siuvasen rē cha cjua cojo xuta xihin xi fi faharcun me ngajan ngasunscun vē. Sehe catsingatju me ngujo xuta xa rē xi quijicojo me nahmi cojo yahnga xuta levita. Me vēhē ne, tsujyihya me nandya rē Judá xi cuicuya me xuta ley rē Nina.

Hacuaha yahatsja me ngu xca rē xujun rē ley jan xi cavicuya me tsēhē.

Peru hya xi camá nchina me, hacuaha camá hñu ngahñu rē Josafat ne, cavetsun cjuatacun ndaja rē me, ta hya ne, catsinguixan me cha Joram, cha quihndi tjun rē me cojo na Atalia, na quihndi rē na Jezabel cojo Acab. Hane cojo cjuavixan jan ne, casahmi me compromisu xi cuisecoo xicjin me. Cavatju ngujo sa nu. Sehe Josafat ne, quiji cavusehenhya me Acab, cumba rē me, ngajan Samaria, cahndē rcu rē Acab. Hya xi quitaha me ngajan ne, cachja Acab xi xi má rē me ne, sá xi sahmitangun sindadu cjín rē me ne, cumá cuya cjuaha nga sindadu jan nandya Ramot, distritu Galaad xi cafahaxin sindadu sirio. Cachuya rē Josafat cjua jan, peru cachja me xi tjun cuinenguise me Nina tsēhē. Hya xi camá ne, casahmitangun Acab ñuju cientu profeta, hane profeta jan ne, ngu tangun ni cachja me xi Nina ne, cuisecoo me sindadu jan xcun si. Peru profeta jan ne, xi cjuaquixi ne, hacuiin profeta rē Nina. Hane Josafat ne, cavinenguise me sá xi tsajin sa ngu profeta xi cuma cuichja. Hane Acab ne, cachja me xi tacun ngu sa xi hmi rē Micaías. Peru choho vëë me Micaías ta chjaain cha xi ndaja cumá ta yējē nixtin ne, cjua

xi chja cha cojo rē me xi cumá ne, cjua xi miji cuihndē me tsēhē.
 Pero Josafat ne, hatuxa meje cuihndē me cjua xi cuichja Micaías.
 Vēhē xi catsingatju Acab cjua rē cha xi cuinduva cha. Hane hya xi
 cafehe Micaías ne, cachja cha xi scaain rē me xcun si. Hacuaha
 cachja cha xi casua Nina cahndē xi cuichja profeta xi yahnga
 cjuandesu xi scaa rē me cojo sa xi cjue Acab xcun si jan sehe cueya
 me.

Acab cojo Josafat ne, cafaaincuenda me cjua vē. Quiji cafaha
 xicjin me cojo sindadu sirio xi siu ngajan nandya Ramot. Hane xi
 quiji me ne, Acab ne, catsindeya me xcusun rē me cojo sa xi tsejen
 sacuah tu jarē ni sindadu rē me. Peru sacuah Josafat ne, yaja me
 tsjian rē xuta matitjun. Hane ngatsē rē xi xuta matitjun tsēhē Sirio
 ne, hatuxa meje rē me xi cueya Acab ne, sindadu cjín rē Sirio ne,
 quijitjengui rē Josafat ta tsejen xi xuta matitjun me. Peru xi
 cavechutaha sindadu Josafat, ngutjen tsejen xi hacuiin Acab má me,
 hane tsajin mé casahmi me cojo me. Peru xcun si jan ne, ngu
 sindadu ladu sirio ne, tuyē ni cavetaha cha ngu yandiji rē yanchixnu
 rē cha hane casehen rē Acab. Casehen rē tsjian quicha rē me hisca
 casetahacoo. Hane xi cavetje tsuhi ne, cahme me cahntsua carreta rē

me. Sehe sindadu rē me ne, quijicojo me yojo rē me nangui rē me hane ngajan caseya niji me. Hya xi camá ne, cavane xuta carreta xi quiji cojo yojo rē me, ta jemu quitsē rē jni rē nima. Hane xi caxtundi jni rē me nangui ne, cachimajnu chu naña jni vē. Cuatjin camachihin cjua rē Nina xi cachja Elías cojo Acab. Can jo nu cavitexa Acab nangui Israel sehe cahme me. Hane quihndi rē me xi hmi rē Ocozías ne, cavisehen me cahndē rē nahmi rē me. Hacuaha tangun xcusun rē me cojo xcusun rē nahmi rē me.

Hane xi cavuya Josafat ndava me ngajan Jerusalén ne, ngu profeta xi hmi rē Jehú quiji me cachja cojo me cuitjin:

—Cachuyiin rē Nina xi cavisecuun rē nima ta hacuiin xuta ndaja me. Xi chuya rē Nina ne, xi caninguetsun ngasunscun hisca faharcun xuta nina ndacha. Hacuaha chuya rē me xi cachjahyun cjuatacun rē me cojo sa xi ndaja cuitexun. —Cuatjin cachja profeta cojo Josafat.

Vēhē xi quiijinduju sa Josafat ndiya rē Nina. Cavinchahaxi me xuta xi cuya cjuaharcun me Nina cjuaquixi ta Nina ne, cavaxē me xutachanga rē me tsēhē nangui Egipto sehe casua me nangui

Canaán. Hacuaha cavaxijin me xuta xi cumá me juez, sehe cavitexa me me xi ndaja sahmi me cuenda rë cjuatacun rë xuta, hane hacuiin tuyjê sahmi me ta sahmi me tucu xi chja ley rë Nina.

Hya xi cavatju sa nixtin ne, cafehe sindadu cjín rë Moab cojo Amón cojo ngu jo sa sindadu cjín xi cjuaha xicjin me cojo xuta nangui Judá. Hane hya xi casacu rë Josafat cjua xi nduva me ne, cachja me cojo xuta xi cuiyuju xun yějê me. Hacuaha casahmitangun me xuta yungun cojo sa xi sahmi me oración rë me cojo Nina. Cuitjin cachja me:

—Ngayun Nina niji ne, ngayun vitexun yějê ni. Hacui ngayun xi catuhun niji nangui vi ta xuta tjê rë Abraham má yin hane vinga nuju Abraham. Xutachanga niji catsindaja me yungun xi tsujun vi. Catsindaja me cojo sa xi hya xi nechinyin xcun cjuandya ne, cuma chjayin nuju xi cuisecun niji. Hacuaha hya xi catuhun nangui vi xi cafahatsja xutachanga niji ne, catuun cahndê xi cjuaha me nangui rë xuta amonita o sá tsêhê xuta moabita o sá tsêhê xuta edomita. Hane vêhê xi siucuaha xuta vê quihndê. Peru cahndê xi ndama rë me xi cuatjin camá ne, tu choho meje sahmi me cojo niji. Ngayin ne, hyiin

mé xi nihñi hane vëhë xi tichjayin nuju xi cuisecun niji ta me vëhë ne, hitsë sa jemu hñu cjua me xi cumá niji.

Hya xi cajnetaha casahmi xuta rë nangui Judá oración rë me ne, Nina catsingatju me cjua rë xuta cojo ngu cha levita xi hmi rë Jahaziel. Cuitjin cachja Jahaziel:

—Xicarcuun. Hacuini ngayun nihñu si cojo me ta Nina ne, cuaja xicjin me tsujun si vihi. Hane xi cuma nchujun ni ne, cuangun sacuaaha cuangun xcun si hane ngajan chutsujun hacutjin cuaxëtje me ngayun tsëhë condra nuju.

Hane cojo cjua vëhë ne, cafaha ngahñu yojo rë me, sehe cavixcunhñchi me casua me nacuechji rë Nina. Hacuaha ngujo xuta levita ne, cavetsihin casahmi jyë casahmi hnga me Nina.

Hane xi camá tajñu nga ne, sindadu cjin rë nangui Israel quiji casacu xicjin me cojo xuta condra rë me. Peru Josafat, xuta xi matitjun tsëhë me ne, cachja me xi ngujo xihin ne, cjue tjun me hane së me xi sahmi jyë sahmi hnga me Nina. Hane Nina casahmi me xi hora xi cavihndë xuta condra jan xi së xuta vëhë ne, cavetsun

cjuatacun rē me, hane cahndē rē xi cjue sahmi me si cojo xuta nangui Judá ne, cavetsihin cavaja xicjin me ngajñi rē me. Hane hya xi sindadu Judá cavechutaha me condra rē me ne, ha cafē cahme yějē ni me vēhē. Vēhē xi sindadu cjín rē Judá ne, cafaya me mé xi yaha nima jan ne, sehe cavuya me ndava me. Taha tisua me nacuechji rē Nina.

Ngu ndiya sa casahmi Josafat compromisu cojo me xi matitjun tsēhē nangui Israel xi cuisecoo xicjin me. Hya ne, meje sahmi me ngu negocio rē barcu cojo Ocozías, quihndi rē Acab. Hane cachuyiin rē Nina xi cumatangun me cojo xuta chohocun. Vēhē xi catsingatju Nina profeta Eliezer xi cachja cojo Josafat. Cachja Eliezer xi castigu xi sacu rē me ne, cuitjin cumá ta chusehen barcu jan xcun nanda hane cuacjan. Hane cuatjin camá jain ta catotoho barcu jan cachusehen xcun nanda.

